



Broj: 01-50-1-15-50/17
Sarajevo, 26. 7. 2017.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO 15-09-2017			
Organizaciona jedinica	Klasifikaciona oznaka	Redni broj	Broj priloga

ZAPISNIK

50. sjednice Predstavničkog doma Parlamentarne skupštine Bosne i Hercegovine, održane 26. 7. 2017.

Sjednica je počela u 10,10 sati. Prisustvovalo je 39 poslanika.¹

Sjednici su prisustvovali predsjedavajući i članovi Vijeća ministara BiH i predstavnik Agencije za nadzor nad tržištem BiH.

Iz međunarodnih organizacija sjednicu su pratili predstavnici OHR-a i EUSR-a, iz nevladinih organizacija prisustvovao je predstavnik CCI-a, te predstavnik američke ambasade u BiH.

U vezi sa izmjenama i dopunama dnevnog reda sjednice, predsjedavajući Šefik Džaferović napomenuo je sljedeće:

Na zahtjev Ustavnopravne komisije, s dnevnog reda skinute su:

Tačka 3. Prijedlog zakona o parlamentarnom nadzoru, predlagač: Privremena zajednička komisija oba doma Parlamentarne skupštine BiH za pripremu i upućivanje u parlamentarnu proceduru Prijedloga zakona o parlamentarnom nadzoru, broj: 01,02-02-1-1348/17, od 26.5.2017. (drugo čitanje),

Tačka 9. Prijedlog zakona o dopuni Izbornog zakona Bosne i Hercegovine, predlagač: poslanik Denis Bećirović, zakon broj: 01-02-1-1074/17, od 21.4.2017. (prvo čitanje), i

Tačka 10. Prijedlog zakona o dopunama Krivičnog zakona Bosne i Hercegovine, predlagač: poslanik Denis Bećirović, zakon broj: 01-02-1-1503/17, od 15.6.2017. (prvo čitanje),

Tačka 13. Izvještaj o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2016. godinu, podnosilac: Predsjedništvo BiH, broj: 01,02-

¹ Nakon rasprave o dnevnom redu, poslanici iz Kluba SNSD-a napustili su sjednicu, ali su prisustvovali sjednici tokom rasprave o Odluci o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH.

16-1-1596/17, od 3.7.2017., skinuta je s dnevnog reda na Zahtjev Komisije za finansije i budžet, te

Tačka 17. Davanje saglasnosti za ratifikaciju Sporazuma o zajmu (Projekat podrške zapošljavanju) između Bosne i Hercegovine i Međunarodne banke za obnovu i razvoj, materijal broj: 01,02-05-2-1546/17, od 22.6.2017., skinuta je s dnevnog reda na zahtjev Komisije za vanjske poslove.

Na prijedlog Komisije za saobraćaj i komunikacije, a odlukom Kolegija Predstavničkog doma u proširenom sastavu, u dnevni red dodata je:

Tačka 13. Preporuke s konferencije „Nacionalni javni radiotelevizijski servis Bosne i Hercegovine“, održane 13. i 14.6.2017. u Sarajevu, broj: 01/5-29-1341/17, od 21.7.2017.

Predsjedavajući je otvorio raspravu o predloženom dnevnom redu. U raspravi su učestvovali: Staša Košarac, Senad Šepić, Saša Magazinović, Momčilo Novaković i Damir Arnaut.

Staša Košarac, u ime poslanika iz Kluba SNSD-a, predložio je dopunu dnevnog reda tačkom koja glasi: Odluka o razrješenju poslanika Šefika Džaferovića dužnosti predsjedavajućeg Predstavničkog doma Parlamentarne skupštine BiH - člana Kolegija Predstavničkog doma.

Senad Šepić tražio je obrazloženje zašto se njegova inicijativa nije našla na dnevnom redu današnje sjednice. Inicijativa glasi: „U skladu s članom 8. Poslovnika Predstavničkog doma Parlamentarne skupštine BiH, predlažem da se u dnevni red prve naredne sjednice Predstavničkog doma Parlamentarne skupštine BiH obavezno uvrsti tačka pod nazivom: Informacija o realizaciji ranijih zaključaka i inicijativa o utvrđivanju najniže, zagarantirane cijene i sigurnog otkupa poljoprivrednih proizvoda u BiH, te prijedlog mjera za odgovor na ovu inicijativu.“

Saša Magazinović izrazio je nezadovoljstvo dnevnim redom sjednice, zbog nedostatka prijedloga zakona čiji je predlagač Vijeće ministara BiH.

Momčilo Novaković predložio je da se s dnevnog reda sjednice skine tačka 4. Prijedlog zakona o izmjeni Zakona o državnoj službi u institucijama Bosne i Hercegovine, predlagač: poslanica Maja Gasal-Vražalica, zakon broj: 01-02-1-1377/17, od 31.5.2017. (drugo čitanje). Momčilo Novaković izrazio je nezadovoljstvo zbog nemogućnosti podnošenja amandmana u plenarnoj fazi jer, prema odredbama Poslovnika Predstavničkog doma, rok za podnošenje amandmana je 24 sata prije početka sjednice Doma, a sjednica Ustavnopravne komisije, na kojoj njegov amandman nije usvojen, održana je 23 sata prije sjednice Doma.

Damir Arnaut istakao je da je, po Poslovniku, osnovni uslov da se određena tačka uvrsti u dnevni red činjenica da je tu tačku razmatrala nadležna komisija, što je ispunjeno u ovom slučaju, te da se u članu 124. stav (2) Poslovnika predviđa mogućnost da se amandmani u plenarnoj fazi podnose ako nisu usvojeni u komisiji, što je do sada Kolegij Doma tumačio tako da rok od 24 sata nije morao biti striktno ispoštovan. Damir Arnaut istakao je da je Momčilo Novaković imao mogućnost da podnese amandman, te da bi Kolegij prihvatio da se on razmatra, u skladu s dosadašnjom praksom.

Nikola Lovrinović predložio je da se s dnevnog reda sjednice skine tačka 13. Preporuke s konferencije „Nacionalni javni radio-televizijski servis Bosne i Hercegovine“, održane 13. i 14.6.2017. u Sarajevu, broj: 01/5-29-1341/17, od 21.7.2017., rekavši da bi preporuke prvo trebalo da obradi Vijeće ministara BiH, odnosno nadležno ministarstvo, te da zauzme stav o tim pitanjima.

Aleksandra Pandurević predložila je dopunu dnevnog reda tačkom koja glasi:

Odluka o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH.

Hanka Vajzović predložila je dopunu dnevnog reda tačkom koja glasi:

Izvještaj o aktivnostima u vezi sa izgradnjom Pelješkog mosta i dešavanjima u vezi sa izgradnjom mosta na Savi kod Svilaja, podnosilac: Ministarstvo komunikacija i prometa BiH.

Sadik Ahmetović predložio je dopunu dnevnog reda tačkom koja glasi:

Informacija Vijeća ministara BiH o razlozima nepotpisivanja Ugovora o Transportnoj zajednici Jugoistočne Evrope.

Dom se prvo izjašnjavao o prijedlogu Staše Košarca. Sa šest glasova „za“ (iz Federacije BiH jedan, iz Republike Srpske pet), 27 glasova „protiv“ i četiri glasa „suzdržan“, prijedlog za dopunu **nije prihvaćen**, nakon čega su poslanici Kluba SNSD-a napustili sjednicu.

Predsjedavajući je rekao da je inicijativa Senada Šepića razmatrana na sjednici Kolegija Doma, da je upućena u nadležnu komisiju i da će biti uvrštena u dnevni red naredne sjednice Doma.

Dom se zatim izjašnjavao o prijedlogu Momčila Novakovića. Predsjedavajući je podsjetio na odredbu člana 124. Poslovnika Doma, kojom se predviđa sljedeće:

- (1) „Poslanici i klubovi poslanika mogu predlagati amandmane kojima se osporavaju amandmani koje je komisija usvojila. Ti amandmani dostavljaju se najkasnije 24 sata prije početka sjednice Doma.
- (2) U istom roku ovlašteni predlagači amandmana iz člana 118. stav (1) ovog poslovnika mogu predložiti amandmane u pisanoj formi koje žele ponovo braniti na sjednici Doma nakon što nisu usvojeni u komisiji.“

Predsjedavajući je rekao da sjednice komisija treba organizirati u skladu s poslovničkim odredbama, tako da se poslanicima ostavi mogućnost da amandmane u plenarnoj fazi mogu podnijeti 24 sata prije održavanja sjednice Doma. Dodao je da je poslanik Damir Arnaut u pravu kada konstatira da je do sada postojala praksa da se postupa i mimo ovih rokova, kako bi se osigurao efikasan rad Doma. Još jednom je ukazao na neophodnost poštivanja poslovničkih rokova, da bi se svim poslanicima dala mogućnost podnošenja amandmana u

propisanim rokovima. Zaključio je da će se u ovom slučaju Dom izjasniti o zahtjevu Momčila Novakovića za skidanje tačke 4. s dnevnog reda.

„Za“ prijedlog Momčila Novakovića glasalo je 20 poslanika (iz Federacije BiH osam, iz Republike Srpske 12), 17 „protiv“, bez glasova „suzdržan“. Predsjedavajući je konstatirao da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 19 glasova „za“, 18 „protiv“ (iz Federacije BiH 17, iz Republike Srpske jedan) i bez glasova „suzdržan“, Dom je usvojio ovaj prijedlog, te je tačka 4. Prijedlog zakona o izmjeni Zakona o državnoj službi u institucijama Bosne i Hercegovine, predlagач: poslanica Maja Gasal-Vražalica, zakon broj: 01-02-1-1377/17, od 31.5.2017. (drugo čitanje), skinuta s dnevnog reda 50. sjednice Doma.

Zatim se glasalo o prijedlogu Nikole Lovrinovića za skidanje tačke 13. s dnevnog reda. Sa 16 glasova „za“ (iz Federacije BiH pet, iz Republike Srpske 11), 18 glasova „protiv“ i tri glasa „suzdržan“, prijedlog nije prihvaćen.

„Za“ prijedlog Aleksandre Pandurević za dopunu dnevnog reda glasala su 23 poslanika (iz Federacije BiH 16, iz Republike Srpske sedam), 13 „protiv“ i jedan je bio „suzdržan“. Predsjedavajući je konstatirao da je Dom usvojio ovaj prijedlog, te da se dnevni red današnje sjednice dopunjava tačkom koja glasi:

Odluka o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH.

Zatim, s 19 glasova „za“ (iz Federacije BiH 13, iz Republike Srpske šest), pet glasova „protiv“ i 13 glasova „suzdržan“, usvojen je prijedlog Hanke Vajzović za dopunu dnevnog reda tačkom:

Izvještaj o aktivnostima u vezi sa izgradnjom Pelješkog mosta i dešavanjima u vezi sa izgradnjom mosta na Savi kod Svilaja, podnosilac: Ministarstvo komunikacija i prometa BiH.

„Za“ prijedlog Sadika Ahmetovića za dopunu dnevnog glasalo je 27 poslanika (iz Federacije BiH 21, iz Republike Srpske šest), sedam „protiv“, a tri su poslanika bila „suzdržana“. Predsjedavajući je konstatirao da je Dom usvojio ovaj prijedlog, te da se dnevni red današnje sjednice dopunjava tačkom koja glasi:

Informacija Vijeća ministara BiH o razlozima nepotpisivanja Ugovora o Transportnoj zajednici Jugoistočne Evrope.

Predsjedavajući je konstatirao da 50. sjednica Predstavničkog doma ima sljedeći

DNEVNI RED

1. Usvajanje zapisnika 48. i 49. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;

3. Prijedlog zakona o izmjenama Zakona o osnovama sigurnosti saobraćaja na putevima u Bosni i Hercegovini, predlagač: poslanik Momčilo Novaković, zakon broj: 01-02-1-1374/17, od 30.5.2017. (drugo čitanje);
4. Prijedlog zakona o izmjeni Zakona o radu u institucijama Bosne i Hercegovine, predlagač: poslanica Maja Gasal-Vražalica, zakon broj: 01-02-1-1378/17, od 31.5.2017. (drugo čitanje);
5. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, predlagač: poslanik Damir Arnaut, zakon broj: 01-02-1-687/17, od 10.3.2017. (zakon u drugom čitanju);
6. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o upravi, predlagač: Vijeće ministara BiH, zakon broj: 01,02-02-1-770/17, od 20.3.2017. (zakon u drugom čitanju);
7. Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine, predlagač: Vijeće ministara BiH, zakon broj: 01,02-02-1-1610/17 od 4.7.2017. (prvo čitanje), skraćeni postupak;
8. Izvještaj o radu Vijeća ministara BiH za 2016. godinu, broj: 01,02-50-19-1411/17, od 5.6.2017.;
9. Izvještaj o aktivnostima u vezi sa izgradnjom Pelješkog mosta i dešavanjima u vezi sa izgradnjom mosta na Savi kod Svilaja, podnosilac: Ministarstvo komunikacija i prometa BiH (realizacija poslaničke inicijative usvojene na 49. sjednici Predstavničkog doma, održanoj 5.7.2017.), akt broj: 01-50-1-1474/17, od 25.7.2017.
10. Izvještaj o radu Istražne komisije Predstavničkog doma PSBiH za utvrđivanje stanja u Izvozno – kreditnoj agenciji BiH, broj: 01-50-5-223-9,9/17, od 27.6.2017.;
11. Odluka o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH, predlagač tačke: poslanica Aleksandra Pandurević, akt broj: 01-50-1-15-50/17, od 26.7.2017.
12. Razmatranje poslaničke inicijative Nikole Lovrinovića, podnesene 16.6.2017., koja glasi: „Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu za uvrštavanje u dnevni red naredne sjednice Predstavničkog doma i Doma naroda Parlamentarne skupštine BiH tačku pod nazivom: „Izjašnjavanje domova Parlamentarne skupštine BiH o članu 7. st. (3) i (4) Poslovnika Parlamentarnog odbora za stabilizaciju i pridruživanje između Parlamentarne skupštine BiH i Evropskog parlamenta“, broj: 01-50-1-1508/17.;
13. Informacija o aktivnostima Agencije za nadzor nad tržištem BiH, materijal Zajedničke komisije za ekonomske reforme i razvoj, broj: 03/3-50-14-9-12-3/17, od 12.6.2017.
14. Informacija Vijeća ministara BiH o razlozima nepotpisivanja Ugovora o Transportnoj zajednici Jugoistočne Evrope, predlagač tačke: poslanik Sadik Ahmetović, akt broj: 01-50-1-15-50/17, od 26.7.2017.
15. Preporuke s konferencije „Nacionalni javni radio-televizijski servis Bosne i Hercegovine“, održane 13. i 14.6.2017. u Sarajevu, broj: 01/5-29-1341/17, od 21.7.2017.;

Ad.1. Usvajanje Zapisnika 48. i 49. sjednice Predstavničkog doma Parlamentarne skupštine BiH

Nakon uvodnih napomena, predsjedavajući je otvorio raspravu. Nikola Lovrinović iznio je primjedbu na Zapisnik 49. sjednice, u okviru druge tačke dnevnog reda – Komentari na dobivene odgovore na poslanička pitanja, gdje treba dodati riječi: „*rekavši kako se nada da stenogram koji traži nije izgorio 2012.*“

Zapisnik 48. sjednice usvojen je jednoglasno, s 33 glasa „za“ (iz Federacije BiH 26, iz Republike Srpske sedam).

Zapisnik 49. sjednice, s primjedbom Nikole Lovrinovića, usvojen je jednoglasno, s 33 glasa „za“ (iz Federacije BiH 26, iz Republike Srpske sedam).

Ad.2. Komentari na dobivene odgovore na poslanička pitanja

Predsjedavajući je podsjetio da su, u skladu s članom 170. Poslovnika, do ove sjednice Doma pitanja u pisanoj formi postavili poslanici:

- **Saša Magazinović** – postavio pitanja predsjedavajućem Vijeću ministara BiH, Vijeću ministara BiH, ministru vanjske trgovine i ekonomskih odnosa BiH, Upravi za indirektno oporezivanje BiH i guverneru Centralne banke BiH
- **Denis Bećirović** – uputio inicijativu Kolegiju Doma
- **Senad Šepić** – uputio inicijativu Kolegiju Doma
- **Mirsad Mešić** – postavio pitanje predsjedavajućem Vijeća ministara BiH
- **Miroslav Milovanović** – postavio pitanje predsjedavajućem Vijeća ministara BiH i uputio urgenciju Ministarstvu finansija i trezora BiH
- **Damir Arnaut** – postavio pitanja ministru finansija i trezora BiH i Graničnoj policiji BiH, te ministru pravde BiH i ministru sigurnosti BiH
- **Šemsudin Mehmedović** – postavio pitanje ministru komunikacija i prometa BiH

Sadržaj postavljenih pitanja je sljedeći:

Saša Magazinović

Pitanje postavljeno predsjedavajućem Vijeća ministara BiH

1. „Do kada će Vijeće ministara BiH kršiti član 6. Zakona o Vijeću ministara Bosne i Hercegovine?“

Pitanja postavljena Vijeću ministara BiH i Upravi za indirektno oporezivanje BiH:

1. „Da li ste razmatrali i ako jeste, kakav je stav o izmjeni Zakona o PDV-u u kontekstu pomjeranja roka plaćanja PDV-a s 10. na posljednji dan u mjesecu po isteku poreskog perioda, odnosno prethodnog mjeseca?
2. Da li ste razmatrali i ako jeste, kakav je stav o izmjeni Zakona o postupku indirektnog oporezivanja u kontekstu smanjenja zatezne kamate za svaki dan zakašnjenja u plaćanju PDV-a sa stope od 0,04% na 0,02%?“

Pitanja postavljena predsjedavajućem Vijeća ministara BiH:

1. „Šta je na sastanku Vijeća ministara BiH i Vlade Republike Hrvatske dogovoreno o problemu izgradnje odlagališta radioaktivnog otpada na području Trgovske gore u općini Dvor, uz granicu s BiH?
2. Šta je na sastanku Vijeća ministara BiH i Vlade Republike Hrvatske dogovoreno o rješenju problema utvrđivanja granice između dvije države?
3. Šta je na sastanku Vijeća ministara BiH i Vlade Republike Hrvatske dogovoreno u vezi sa izgradnjom Pelješkog mosta?
4. Šta je na sastanku Vijeća ministara BiH i Vlade Republike Hrvatske dogovoreno o problemu eksploatacije hidroakumulacije Buškog jezera od koga Hrvatska elektroprivreda ostvaruje ogromnu dobit?“

Pitanja postavljena guverneru Centralne banke BiH:

1. „Kolika je plaća guvernera Centralne banke BiH Senada Softića i članice Upravnog odbora Centralne banke BiH Ankice Kolobarić?
2. Kolika su njihova ukupna primanja uključujući i članstvo u upravnim odborima i komisijama čiji su eventualni članovi na osnovu dužnosti koju obavljaju? (npr. UO Agencije za osiguranje depozita)?
3. Kolika je bila plaća guvernera Centralne banke BiH kada je preuzeo dužnost, a kolika je sada?
4. Kolika je bila prosječna plaća zaposlenih u Centralnoj banci BiH kada je novi guverner preuzeo dužnost, a kolika je danas?

Denis Bećirović

Inicijativa upućena Kolegiju Predstavničkog doma:

„Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu kojom se zadužuje Vijeće ministara BiH da, u saradnji s entitetskim vladama, najkasnije u roku od šest mjeseci od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi prijedlog mjera efektivne zaštite domaće poljoprivredne proizvodnje u Bosni i Hercegovini.“

Senad Šepić

Inicijativa upućena Kolegiju Predstavničkog doma:

„U skladu s članom 8. Poslovnika Predstavničkog doma Parlamentarne skupštine BiH, predlažem da se u dnevni red prve naredne sjednice Predstavničkog doma Parlamentarne skupštine BiH obavezno uvrsti tačka pod nazivom: Informacija o realizaciji ranijih zaključaka i inicijativa o utvrđivanju najniže, zagarantirane cijene i sigurnog otkupa poljoprivrednih proizvoda u BiH, te prijedlog mjera za odgovor na ovu inicijativu.“

Mirsad Mešić

Pitanje postavljeno predsjedavajućem Vijeća ministara BiH

1. „Zašto do sada nije realizirano imenovanje direktora i zamjenika direktora Agencije za lijekove i medicinska sredstva BiH?“

Miroslav Milovanović

Pitanje postavljeno predsjedavajućem Vijeća ministara BiH

1. „Prošle godine ste jednom prilikom ovdje u Parlamentu, u negativnom kontekstu, pominjali veterinarsku službu i pojedine farmere iz BiH koji su navodno falsificirali određenu dokumentaciju prilikom priprema za izvoz govedeg mesa u Tursku. Navedite mi koje su to veterinarske organizacije i firme na koje ste tada mislili.“

Damir Arnaut

Pitanja postavljena ministru finansija i trezora BiH i Graničnoj policiji BiH:

1. „U vezi sa Izvještajem o finansijskoj reviziji Granične policije BiH za 2015. godinu (akt Ureda za reviziju institucija BiH, broj: 01-04-16-631/16, od jula 2016.) u poglavlju 6.1., strana 12. pod „Ugovorene usluge“ gdje se, *inter alia*, navodi: „Značajni troškovi odnose se na usluge reprezentacije (34.628 KM).“, molim da dostavite tabelarno prikazane sve pojedinačne stavke reprezentacije, interne i eksterne, uključujući informacije o vrsti sastanka i eventualne priloge.
2. Također tabelarno prikazati, po pojedinačnim stavkama, utrošak reprezentacije, interne i eksterne, prema korisniku (jedinica GPBiH, službenik koji je korisnik reprezentacije...), uključujući informacije o vrsti sastanka i eventualne priloge.“

Pitanja postavljena ministru pravde BiH i ministru sigurnosti BiH:

1. „Dostaviti zvanično pojašnjenje medijskih informacija da nekoliko osoba koje su pravosnažno osuđene na zatvorske kazne na osnovu člana 162b. Krivičnog zakona BiH (protuzakonito formiranje i pridruživanje stranim paravojnim ili parapolicijskim formacijama) još uvijek nije upućeno na izdražavanje izrečenih kazni.

2. Zbog čega te osobe još uvijek nisu upućene na izdržavanje kazne, te kojim aktom je omogućeno čekanje izdržavanja kazne za one koji su pravosnažno osuđeni za ovakva djela?
3. Da li Ministarstvo pravde BiH ili Ministarstvo sigurnosti BiH ili Vijeće ministara BiH u cjelini planira dostaviti prijedlog izmjena i dopuna relevantnih zakonskih rješenja kako bi se osiguralo da svi osuđeni na zatvorske kazne na osnovu člana 162b. Krivičnog zakona BiH budu upućeni na izdržavanje kazni odmah po pravosnažnosti presude?
4. Ako planiraju, do kada to planiraju uraditi i da li to planiraju uraditi po hitnom postupku?“

Šemsudin Mehmedović

Pitanje postavljeno ministru komunikacija i prometa BiH

1. „Koje kriterije ste koristili za raspodjelu sredstava od GSM-a prilikom njihove dodjele određenom broju općina?“

Predsjedavajući je rekao da su do današnje sjednice dostavljeni sljedeći odgovori na poslanička pitanja:

- na pitanja **Saše Magazinovića**, postavljena u pisanoj formi na 46., 48. i 49. sjednici, odgovore dostavilo Ministarstvo komunikacija i prometa BiH, Vijeće ministara BiH i guverner Centralne banke BiH
- na pitanje **Fehima Škaljića**, postavljeno u usmenoj formi na 48. sjednici, Vijeće ministara BiH prosljedilo odgovor Ministarstva pravde BiH
- na pitanje **Zaima Backovića**, postavljeno u usmenoj formi na 44. sjednici, odgovor dostavilo Ministarstvo vanjske trgovine i ekonomskih odnosa BiH, te na pitanje postavljeno u usmenoj formi na 45. sjednici Vijeće ministara BiH prosljedilo odgovor Ministarstva komunikacija i prometa BiH
- na pitanje **Hazima Rančića**, postavljeno u usmenoj formi na 48. sjednici, Vijeće ministara BiH prosljedilo odgovor Ministarstva odbrane BiH
- na pitanje **Safera Demirovića**, postavljeno u pisanoj formi na 44. sjednici, odgovor dostavilo Vijeće ministara BiH
- na pitanje **Hanke Vajzović**, postavljeno u pisanoj formi na 46. sjednici, odgovor dostavilo Vijeće ministara BiH, te na pitanje postavljeno u usmenoj formi na 49. sjednici Vijeće ministara BiH prosljedilo odgovor Ministarstva komunikacija i prometa BiH
- na pitanja **Maje Gasal-Vražalice**, postavljena u pisanoj formi na 45. sjednici, odgovore dostavilo Vijeće ministara BiH
- na pitanje **Miroslava Milovanovića**, postavljeno u pisanoj formi na 46. sjednici, odgovor dostavilo Vijeće ministara BiH
- na pitanje **Denisa Bećirovića**, postavljeno u pisanoj formi na 42. sjednici, odgovor dostavilo Vijeće ministara BiH

- na pitanje **Senada Šepića**, postavljeno u usmenoj formi na 48. sjednici, Vijeće ministara BiH prosljedilo odgovor Ministarstva sigurnosti BiH, te na pitanje postavljeno u usmenoj formi na 49. sjednici odgovor dostavilo Vijeće ministara BiH
- na pitanje **Mensure Beganović** postavljeno u pisanoj formi na 46. sjednici, odgovor dostavilo Vijeće ministara BiH
- na pitanje **Damira Arnauta**, postavljeno u pisanoj formi na 42. sjednici, te na pitanje postavljeno u usmenoj formi na 44. sjednici, odgovore dostavilo Ministarstvo vanjskih poslova BiH

Dostavljene odgovore komentirali su poslanici:

Nikola Lovrinović istakao je da još uvijek nije dobio odgovore od Javnog RTV servisa BiH, Federalne televizije i Ministarstva za ljudska prava i izbjeglice BiH i predložio da se navedenim institucijama izrekne kazna, s obzirom na to da sada za to postoji zakonska mogućnost.

Damir Arnaut rekao je da još uvijek nije dobio odgovor na pitanje upućeno Ministarstvu komunikacija i prometa BiH, te je izrazio nezadovoljstvo odgovorima Ministarstva vanjskih poslova BiH. Također je najavio podnošenje interpelacije, s obzirom na nedostavljanje odgovora na pitanja upućena Ministarstvu vanjskih poslova BiH.

Mensura Beganović komentirala je odgovor Vijeća ministara BiH, odnosno Ministarstva vanjske trgovine i ekonomskih odnosa BiH, u vezi s ekonomskom diplomatijom.

Hazim Rančić izrazio je nezadovoljstvo odgovorom Ministarstva odbrane BiH u vezi s aktivnostima koje je to ministarstvo preduzelo na saradnji s nadležnim policijskim agencijama i tužilaštvima, te je zatražio dopunu odgovora.

Hanka Vajzović izrazila je nezadovoljstvo odgovorima Ministarstva komunikacija i prometa BiH.

Senad Šepić komentirao je odgovor Ministarstva sigurnosti BiH u vezi s realiziranjem poslaničke inicijative vezane za prekategoriizaciju graničnih prijelaza, te je zatražio da se odgovor dopuni.

Fehim Škaljić komentirao je odgovor Ministarstva pravde BiH u vezi s praksom oduzimanja privatne imovine, koja je konstituirana u socijalizmu.

Maja Gasal-Vražalica zatražila je da se Agenciji za statistiku BiH uputi urgencija za dostavu odgovora. Komentirala je odgovor Ministarstva civilnih poslova BiH, odnosno ministarstava obrazovanja u Bosni i Hercegovini u vezi s mogućnošću održavanja nastave u kući za djecu s teškoćama u razvoju, koja ne mogu nastavu pohađati u školi, te je istakla da jedino nije dobila odgovor od Ministarstva obrazovanja Kantona 10.

Damir Bećirović je od Ministarstva pravde BiH zatražio dostavu odgovora na pitanje vezano za „ratni zločin ubistva vozača iz tuzlanskog konvoja spasa i pljačkanja tog konvoja”.

Safer Demirović komentirao je odgovor Vijeća ministara BiH vezano za pitanje preuzimanja evropskih direktiva iz tzv. novog pristupa u zakonodavstvo Bosne i Hercegovine i izrazio zadovoljstvo načinom pisanja odgovora, te nezadovoljstvo njegovom sadržinom.

Ad.3. Prijedlog zakona o izmjenama Zakona o osnovama sigurnosti saobraćaja na putevima u Bosni i Hercegovini, predlagač: poslanik Momčilo Novaković, zakon broj: 01-02-1-1374/17, od 30.5.2017. (drugo čitanje)

Predsjedavajući Šefik Džaferović dao je uvodne napomene i otvorio raspravu. Diskutirali su Damir Arnaut i Momčilo Novaković.

Damir Arnaut konstatirao je da nema poslovnčkih uslova da se raspravlja o Prijedlogu zakona, s obzirom na to da predlagač nije prisutan i predložio da se ova tačka skine s dnevnog reda zbog odsustva predlagača ili da se pozove Dom da odluči hoće li se u njegovom odsustvu ipak izjašnjavati o ovom prijedlogu.

Nakon toga Klub poslanika SDS-a zatražio je desetominutnu pauzu.

Nakon pauze, Damir Arnaut ukazao je na odredbe Poslovnika kojim se predviđa da je, ako je pauza određena na zahtjev nekog od klubova, predstavnik kluba obavezan obrazložiti razlog za pauzu. Također, podsjetio je na član 7. stav (4) Poslovnika, kojim je predviđeno da poslanik koji mora napustiti sjednicu za vrijeme njenog trajanja na vrijeme obavještava predsjedavajućeg Doma, te iznosi razloge svog odsustva. Zatražio je da se obje intervencije unesu u Zapisnik 50. sjednice Doma.

Prijedlog zakona o izmjenama Zakona o osnovama sigurnosti saobraćaja na putevima u Bosni i Hercegovini **usvojen je** jednoglasno, u drugom čitanju, s 33 glasa „za” (iz Federacije BiH 26, iz Republike Srpske sedam).

Ad.4. Prijedlog zakona o izmjeni Zakona o radu u institucijama Bosne i Hercegovine, predlagač: poslanica Maja Gasal-Vražalica, zakon broj: 01-02-1-1378/17, od 31.5.2017. (drugo čitanje)

Predsjedavajući je dao uvodne napomene i otvorio raspravu. Nije bilo prijavljenih.

Dom, s 22 glasa „za” (iz Federacije BiH 15, iz Republike Srpske sedam), četiri glasa „protiv” i sedam glasova „suzdržan”, **usvojio je u drugom čitanju** Prijedlog zakona o izmjeni Zakona o radu u institucijama Bosne i Hercegovine.

Ad.5. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, predlagač: poslanik Damir Arnaut, zakon broj: 01-02-1-687/17, od 10.3.2017. (zakon u drugom čitanju)

Predsjedavajući Šefik Džaferović dao je uvodne napomene. O ovoj tački nije bilo rasprave.

Dom je, s 23 glasa „za“, četiri „protiv“ (iz Federacije BiH) i pet glasova „suzdržan“, **usvojio u drugom čitanju** Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini.

Time su usvojeni i amandmani koji glase:

Amandman I.

U članu 2. Prijedloga zakona, kojim se u članu 126. važećeg zakona dodaje novi stav (2), u navedenom stavu (2) iza riječi: „sudske policije,“ dodaju se riječi: „zatvorske policije - straže,“.

Amandman II.

U članu 2. Prijedloga zakona, kojim se u članu 126. važećeg zakona dodaje novi stav (2), u navedenom stavu (2) iza riječi: „osim u odnosu na“ dodaju se riječi: „vozila iz stava (1) ovog člana.“

Ad.6. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o upravi, predlagač: Vijeće ministara BiH, zakon broj: 01,02-02-1-770/17, od 20.3.2017. (zakon u drugom čitanju)

Predsjedavajući Šefik Džaferović dao je uvodne napomene. O ovoj tački nije bilo rasprave.

Dom je, s 27 glasova „za“, bez glasova „protiv“ i šest glasova „suzdržan“, **usvojio u drugom čitanju** Prijedlog zakona o izmjenama i dopunama Zakona o upravi.

Ad.7. Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine, predlagač: Vijeće ministara BiH, zakon broj: 01,02-02-1-1610/17 od 4.7.2017. (prvo čitanje), skraćeni postupak

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 27 glasova „za“ (iz Federacije BiH 20, iz Republike Srpske sedam), bez glasova „protiv“ i šest glasova „suzdržan“, usvojio u prvom čitanju Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine.

Ad.8. Izvještaj o radu Vijeća ministara BiH za 2016. godinu, broj: 01,02-50-19-1411/17, od 5.6.2017.

Predsjedavajući je dao uvodne napomene i otvorio raspravu.

Domu se najprije obratio predsjedavajući Vijeća ministara BiH Denis Zvizdić, a uporedo s njegovim obraćanjem poslanicima je elektronski prezentiran Izvještaj o radu Vijeća ministara Bosne i Hercegovine za 2016. godinu, a u skladu s odlukom Kolegija Doma u proširenom sastavu.

U raspravi su učestvovali: Saša Magazinović, Nikola Lovrinović, Jasmin Emrić, Šemsudin Mehmedović, Senad Šepić, Maja Gasal - Vražalica, Salko Sokolović, Sadik Ahmetović, Aleksandra Pandurević, Nermina Kapetanović, Mirsad Isaković, Momčilo Novaković, Hazim Rančić, Šefik Džaferović, Amir Fazlić, Željko Komšić, Damir Arnaut, Asim Sarajlić i Mirsad Donlagić.

Predsjedavajući Vijeća ministara BiH Denis Zvizdić obratio se Domu i nakon rasprave, a zatim su ponovo diskutirali: Damir Arnaut, Saša Magazinović, Jasmin Emrić i Mirsad Donlagić.

Komisija za vanjsku trgovinu i carine, u svom mišljenju predložila je zaključak. S 33 glasa „za“ (iz Federacije BiH 20, iz Republike Srpske 13), pet glasova „protiv“ i jednim glasom „suzdržan“, Dom je usvojio zaključak, a on glasi:

„Sugerira se Vijeću ministara BiH da promijeni metodologiju i način pisanja izvještaja o radu Vijeća ministara BiH, te da novu metodologiju vežu za program rada iz prethodne godine.“

„Za“ Izvještaj o radu Vijeća ministara BiH za 2016. godinu glasalo je 17 poslanika (iz Federacije BiH 11, iz Republike Srpske šest), „protiv“ 21, a jedan je bio „suzdržan“. Predsjedavajući je konstatirao da Izvještaj nije usvojen.

Ad.9. Izvještaj o aktivnostima u vezi sa izgradnjom Pelješkog mosta i dešavanjima u vezi sa izgradnjom mosta na Savi kod Svilaja, podnosilac: Ministarstvo komunikacija i prometa BiH (realizacija poslaničke inicijative usvojene na 49. sjednici Predstavničkog doma, održanoj 5.7.2017.), akt broj: 01-50-1-1474/17, od 25.7.2017.

Predsjedavajući je dao uvodne napomene i otvorio raspravu. U raspravi su učestvovali: Hanka Vajzović, Damir Arnaut, Damir Bećirović, Momčilo Novaković, Nikola Lovrinović i Sadik Ahmetović.

Na prijedlog Hanke Vajzović, Dom je, s 23 glasa „za“ (iz Federacije BiH 16, iz Republike Srpske sedam), sedam glasova „protiv“ i dva glasa „suzdržan“, odgodio daljnju raspravu o ovoj tački dnevnog reda za narednu sjednicu Doma.

Ad.10. Izvještaj o radu Istražne komisije Predstavničkog doma PSBiH za utvrđivanje stanja u Izvozno – kreditnoj agenciji BiH, broj: 01-50-5-223-9,9/17, od 27.6.2017.

Predsjedavajući je dao uvodne napomene i otvorio raspravu. Diskutirao je Amir Fazlić.

Dom je, s 26 glasova „za“ (iz Federacije BiH 19, iz Republike Srpske sedam), bez glasova „protiv“ i šest glasova „suzdržan“, usvojio Izvještaj o radu Istražne komisije Predstavničkog doma PSBiH za utvrđivanje stanja u Izvozno-kreditnoj agenciji BiH, sa zaključcima sadržanim u Izvještaju. Zaključci glase:

- 1. Ističemo evidentnu potrebu i važnost daljnjeg postojanja IGA-e za kvalitetnu podršku bh. izvoznicima.**
- 2. Predstavnički dom PSBiH od Upravnog odbora i rukovodstva IGA-e traži:**
 - podnošenje detaljnog dodatnog izvještaja Vijeću ministara BiH o stanju u IGA-i s prijedlogom mjera za daljnji rad u pogledu izbora optimalnog organizacionog rješenja, potrebnih izmjena zakonskih i podzakonskih akata, definiranja prava i obaveza osnivača,**
 - da prati stanje sudskih procesa s posebnim osvrtom na poslovanje i trenutnu situaciju u vezi s Unis Fabrikom cijevi Derventa i o tome informira nadležne institucije.**
- 3. Ističemo da je Vijeće ministara BiH u svim sazivima od formiranja IGA-e odgovorno za nekonstituiranje Međuministarskog vijeća (član 15. Zakon o IGA), a što je značajno uticalo na nedovoljan nadzor u poslovanju i probleme u funkcioniranju Izvozno-kreditne agencije BiH.**
- 4. Predstavnički dom PSBiH traži od Vijeća ministara BiH:**
 - detaljnu analizu rada IGA-e uz poseban naglasak na poslovanje s Unis fabrikom cijevi Derventa u okolnostima nastalim usvajanjem plana finansijskog i operativnog restrukturiranja Unis fabrike cijevi Derventa,**

- *hitno imenovanje Upravnog odbora IGA-e,*
 - *hitno donošenje konačne odluke u pogledu definiranja optimalnog rješenja za budući rad Izvozno-kreditne agencije BiH,*
 - *hitnu izradu i poboljšanje zakonskog okvira za rad Izvozno-kreditne agencije BiH.*
- 5. Ističemo da IGA nije u potpunosti djelovala u skladu sa Zakonom o IGA-i. Postoje ozbiljne sumnje u nezakonito poslovanje Unis fabrike cijevi Derventa prilikom uvoza 65.000 tona repromaterijala radi prerade za daljnji izvoz koji nikada nije realiziran, te da Uprava za indirektno oporezivanje BiH nije zakonito postupala u slučaju praćenja uvoza repromaterijala, razduživanja PDV-a, te izvoza gotovih proizvoda Unis-fabrike cijevi Derventa**
- 6. Jedan primjerak ovog izvještaja treba dostaviti Tužilaštvu BiH.**

Ad.11. Odluka o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH, predlagatelj tačke: poslanica Aleksandra Pandurević, akt broj: 01-50-1-15-50/17, od 26.7.2017.

Predsjedavajući je dao uvodne napomene. U raspravi su učestvovali: Damir Arnaut, Aleksandra Pandurević, Mladen Bosić, Predrag Kožul, Sadik Ahmetović, Mirsad Donlagić, Staša Košarac, Dušanka Majkić, Momčilo Novaković, Lazar Prodanović i Nikola Špirić.

Damir Arnaut predložio je zaključak koji glasi: „Dom će se o ovom pitanju izjašnjavati tako da se prvo izjasni o smjeni člana Komisije, a da potom glasa o izboru novog člana Komisije. Ako član bude smijenjen, SBB predlaže da se za novog člana Komisije izabere poslanik Mirsad Donlagić.“

Sa osam glasova „za“ (iz Federacije BiH), 24 „protiv“ i bez glasova „suzdržan“, Dom nije usvojio prijedlog zaključka.

Zatim je Dom, s 24 glasa „za“ (iz Federacije BiH 17, iz Republike Srpske sedam), 14 „protiv“ i bez glasova „suzdržan“, usvojio Odluku o izmjeni Odluke o izboru članova Zajedničke komisije za nadzor nad radom Obavještajno - sigurnosne agencije BiH, gdje se riječi: „Nikola Špirić“ zamjenjuju riječima: „Borislav Bojić“.

Ad.12. Razmatranje poslaničke inicijative Nikole Lovrinovića, podnesene 16.6.2017., koja glasi: „Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu za uvrštavanje u dnevni red naredne sjednice Predstavničkog doma i Doma naroda Parlamentarne skupštine BiH tačku pod nazivom: „Izjašnjavanje domova Parlamentarne skupštine BiH o članu 7. st. (3) i (4) Poslovnika Parlamentarnog odbora za stabilizaciju i pridruživanje između Parlamentarne skupštine BiH i Evropskog parlamenta“, broj: 01-50-1-1508/17.

Predsjedavajući je dao uvodne napomene i otvorio raspravu. U raspravi su učestvovali: Nikola Lovrinović, Fehim Škaljić, Saša Magazinović, Momčilo Novaković, Nermina Kapetanović i Mladen Bosić.

Mladen Bosić predložio je da se daljnja rasprava o ovoj tački odgodi za narednu sjednicu radi konsultacija. Ovaj prijedlog usvojen je s 27 glasova „za“ (iz Federacije BiH 21 iz Republike Srpske šest), bez glasova „protiv“ i pet glasova „suzdržan“, te je rasprava odgođena za narednu sjednicu.

Ad.13. Informacija o aktivnostima Agencije za nadzor nad tržištem BiH, materijal Zajedničke komisije za ekonomske reforme i razvoj, broj: 03/3-50-14-9-12-3/17, od 12.6.2017.

Predsjedavajući je dao uvodne napomene i otvorio raspravu. Kratko je diskutirao Đorđo Krčmar.

Predsjedavajući je predložio da se rasprava o ovoj tački odgodi za narednu sjednicu Doma, kako bi Agencija za nadzor nad tržištem BiH pripremila elektronsku prezentaciju o svojim aktivnostima.

Dom je, s 26 glasova „za“ (iz Federacije BiH 20, iz Republike Srpske šest), jednim „protiv“ i pet glasova „suzdržan“, usvojio ovaj prijedlog, te je rasprava odgođena za narednu sjednicu Doma.

Ad.14. Informacija Vijeća ministara BiH o razlozima nepotpisivanja Ugovora o Transportnoj zajednici Jugoistočne Evrope, predlagač tačke: poslanik Sadik Ahmetović, akt broj: 01-50-1-15-50/17, od 26.7.2017.

Predsjedavajući je dao uvodne napomene i otvorio raspravu. U raspravi su učestvovali: Sadik Ahmetović, Momčilo Novaković, Nikola Lovrinović, Šemsudin Mehmedović, Damir Arnaut, Željko Komšić i Aleksandra Pandurević.

Domu su se obratili predsjedavajući Vijeća ministara BiH Denis Zvizdić i ministar finansija i trezora BiH Vjekoslav Bevanda.

Poslanik Šemsudin Mehmedović u raspravi je predložio zaključak. S 23 glasa „za“ (iz Federacije BiH 16, iz Republike Srpske sedam), 10 „protiv“ i pet glasova „suzdržan“, Dom je usvojio zaključak, a on glasi:

„Traži se od Vijeća ministara BiH da dostavi Informaciju o Odluci / Ugovoru o formiranju Transportne zajednice zemalja Zapadnog Balkana i da dostavi odgovore na pitanja:

- Koje oblasti transporta obuhvata, a koje ne?***

- *Da li je eventualno usvajanje u koliziji sa usvojenim strateškim dokumentima u BiH?*
- *Da li Vijeće ministara BiH raspolaže analizom koja će pokazati koje su prednosti i nedostaci ovog ugovora?*
- *Koliko su transportna javna preduzeća spremna za otvaranje tržišta?*
- *Koliko je neophodno sredstava za obnovu i unapređenje infrastrukture u BiH?*
- *Da li će ovaj ugovor ratificirati Parlamentarna skupština BiH?*
- *Ko i kako će vraćati kredite?*

Ad.15. Preporuke s konferencije „Nacionalni javni radio-televizijski servis Bosne i Hercegovine“, održane 13. i 14.6.2017. u Sarajevu, broj: 01/5-29-1341/17, od 21.7.2017.

Predsjedavajući je dao uvodne napomene i otvorio raspravu. U raspravi su učestvovali: Nikola Lovrinović, Momčilo Novaković i Maja Gasal – Vražalica.

Na prijedlog Komisije za saobraćaj i komunikacije, s 28 glasova „za“ (iz Federacije BiH 21, iz Republike Srpske sedam), 10 „protiv“ i bez glasova „suzdržan“, zaključci su usvojeni, a glase:

- 1. Predstavnički dom Parlamentarne skupštine BiH traži od Odbora Javnog radiotelevizijskog sistema BiH da Domu dostavi Nacrt izmjena i dopuna Zakona o Javnom radiotelevizijskom sistemu BiH kojim će osigurati privremeno finansiranje javnih emitera u periodu od godinu dana, do utvrđivanja konačnog rješenja za finansiranje Javnog RTV sistema BiH.*
- 2. Predstavnički dom Parlamentarne skupštine BiH traži od Interresorne radne grupe za analizu primjene Zakona o Javnom radiotelevizijskom sistemu BiH da hitno počne raditi.*
- 3. Predstavnički dom Parlamentarne skupštine BiH zadužuje Vijeće ministara BiH da u roku od 60 dana izradi akcioni plan za rješavanje pitanja finansiranja Javnog RTV sistema BiH, u koji je uključena i finansijska pomoć za izmirenje dugovanja i obaveza BHRT-a.*
- 4. Predstavnički dom Parlamentarne skupštine BiH ukazuje na značaj i hitnost potrebe da Parlament Federacije BiH u najkraćem roku provede postupak imenovanja članova Upravnog odbora Radio-televizije Federacije BiH.*

Zatim se Dom izjasnio o prijedlozima zaključaka iz rasprave, i to o prijedlogu zaključka Nikole Lovrinovića i prijedlogu zaključka Maje Gasal-Vražalice.

„Za“ prijedlog zaključka poslanika Nikole Lovrinovića glasalo je 16 poslanika (iz Federacije BiH 10, iz Republike Srpske šest), „protiv“ 17, „suzdržanih“ pet. Predsjedavajući je konstatirao da prijedlog zaključka nije usvojen, a on glasi:

„Tačka 15. Preporuke s konferencije „Nacionalni javni radio-televizijski servis Bosne i Hercegovine“, održane 13. i 14.6.2017., prima se k znanju kao informacija.“


Dom je, s 28 glasova „za“ (iz Federacije BiH 21, iz Republike Srpske sedam), 10 „protiv“ i bez glasova „suzdržan“, usvojio zaključak poslanice Maje Gasal-Vražalice. Zaključak glasi:

„Zadužuje se Odbor Javnog RTV sistema BiH da dostavi cjelovitu informaciju o svom radu i stanju u RTV sistemu.“

Sjednica je završena u 21, 10 sati.

Sastavni dio Zapisnika je transkript 50. sjednice Predstavničkog doma.

SEKRETAR
PREDSTAVNIČKOG DOMA

Marin Vučković


PREDSJEDAVAJUĆI
PREDSTAVNIČKOG DOMA

Šefik Džaferović
